

15 MARS 1986
KONFERANS
INTERNASIONAL
TRIPOLI - LIBI
 (Paz 2)



FANAL

4 ME 1987
RANKONT
EK KADHAFI
TRIPOLI - LIBI
 (Paz 3)

ZOURNAL INDEPANDANTIS RENIONE

Sé Lorganizacion Popilèr po Libèr nout Péi - LPLP i fé sort ali - Ladrès : 3 ruelle du Pont 97427 Etang-Salé Les-Hauts
 Téléfonn : 0692 168 947 - Mèl : fanal@lorganizacion.org - Sitweb : <http://www.lorganizacion.org>
 N° 37 Ziyn 2023 - I tir in pe si papié sinonsa trap ali si nout sitweb - Lotorizasion : 2013/0497 - ISSN : 2266-9434 - Na 11 Lané i sort
 Dirèkter zournal : Bernard GRONDIN

SERGE SINAMALE

la lès anou in léritaz politik po minn la lit po lindépandans

Sétané na 15 zan nout kamarad Serge Sinamale la kit anou, té in 12 ziyn 2008, dann lèr granmatin. Tout sa vi li la batay po lo pèp réniyé, po lindépandans nout péi. Kan té falé, li la parti an Tanzani po koz ek lo Gran Lorganizacion bann péi Lafrik (OUA) dann zané 70-80, po fé konèt lo sitiasion kolonial Larénion. Kan té falé, li la parti an Libi po war lo Kolonèl Kadhafi, Kan té falé, li la rankont tout bann lider indépandantis la Gwadeloup, la Kaniki ... ek bann lider progrésis bann péi Loséan Indiyen. Li té dan tout bann lorganizacion kontkolonial dopi zané 60, li la mèt dobout bann mouvman kom OCMLR, lo MPLR ek lo MIR an sektanm 1981. An ziyn 2008, in sominn avan li lé mor, nou lavé in réniyon ek li Sintandré. Lo 14 ziyn 2008, li devé èt ek nou po lo promié gran réniyon lo LPLP.



LI LA GALIZ SOMIN PO NOU



Po Serge Sinamale, ali ek Tristan Souprayenmestry, la fé in lèrèr, kan zot la asosié azot ek Jean Baptiste Ponama po mont lo MIR an sektanm 1981. Li lavé ékri sa dan in dokiman i dat lo 8 novanm 1987, ke na rovnir dosi plis an détay dann zournal la. Toutsa va permèt anou mié konprann, koman in bèzman la pi pète dan in réniyon lo MIR lo 2 févrié 1986, é mèt an danzé lo mouvman indépandantis réniyé. Lé inportan konèt po listwar, sirtou kan lo bann konsékans i pèz ankor si nou zordi. Na ankor domoun zordi i zwé ek lo fe.


LI LA LES ANOU IN LERITAZ POLITIK



Po listwar nou pans lé inportan konèt vréman lo pansé Serge Sinamalé su son rolasion ek Jean-Baptiste Ponama é kèl rol shakinn la zwé dan listwar lo mouvman indépandantis rénié.

Serge Sinamalé té dan la mouvans indépandantis dopi 1975 kan la mèl dobout Lorganizacion kominis marsis léninis Larénion (OCMLR) té lo promié lorganizacion indépandantis Larénion. Aprés lavé lo MPLR an 1979 é lo MIR an sektanm 1981. Sé riyk la, an 1981 ke Jean-Baptiste Ponama (li la kit lo PCR an 1978) la rant podvré dan lo mouvman indépandantis.

Tout lo bèzman ant lé 2, la komans podvré kan in délégasion lo MIR ek Serge Sinamalé an tèt, la rovni in voyaz an Libi, lo 25 zanvié 1986 (zot la vé rès près in mwa an Libi). Kan la arivé tout lo bann kamarad la fé arèt azot par la polis kolonial.



Avan alé po la Libi, débi désanm 1985, Serge Sinamalé, Jean-baptiste Ponama, Michel Réale et dot (nou largra pa lo non terla, na in pe va gingn sézisman podvré) lavé mèl dobout in Fron Kontkolonial Larénion, ki déza a lépok té dakor po mèl dobout in Léta rénié (ke nou minm la mèl dobout lo 5 novanm 2017).

IN LETA RENIONE

Po mont azot, ke lo konba lo LPLP i inskri ali dan lo minm démarsh. Nou la parti ankor pli lwin, nou la proklam la Républik Kontkolonial Larénion é nou la fé adop in Konstitision Kontkolonial.

Dan in dokiman i dat lo 8 novanm 1987, Serge Sinamalé i esplik anou tousa, lès ali kozé.

Po Serge Sinamalé "**lo vré militan sé pa sat i rod riyk lonèr, mé sé sat i fé sat i fo san alé dir partou sé li la fé**". Sat la spasé lo 2 févrié 1986, kan Jean-Baptiste Ponama lo rotourn kont li, la ékèr ali é la fé mont in désèpsion an li"

SANTIMAN NASIONAL

Dan dokiman la, Serge Sinamalé i rakont (li minm i di po éklèr nout lantern) "**Apré lo konvansion Morne Rouge an 1971, amwin ek 2-3 kamarad dan lo PCR, la komans mazinn in stratézi po mèl an avan in santiman nasional rénié é nou la di ke nout prinsipal linmi lété linpérialism fransé ek son bann konplis isi Larénion. Zot sé in vré lobstak po ke sa i ariv, po ke lo rénié i rouv lo zié**"

Po nout kamarad, "**lo PCR i parté pa dann dirèksion la é apartir la, zot la pa arèt kritik lo Parti Kominis lads'i**" an dizan ke "**Jean-Baptiste Ponama i soutené a lépok tousa é té li té krash ankor pli for su lo bann militan indépandantis ke na in mové souvenir son bann postir.**"

Serge Sinamalé i rapèl anou osi dan dokiman la, lépok ousa Jean-Baptiste Ponama la kit lo PCR an 1978 "**li voulé bat Paul Vergès deor po pran la plas, li krwayé avèk la gosh an Frans Larénion i pouvé gingn toutswit lotonomi sinonsa lindépan-dans Larénion**".

Aprés li la antéré pandan 3 zan an mazinan son vanzans kont Vergès".

Nout kamarad té dénonos osi "**lo koté kominalis Jean-Baptiste Ponama é son bann konivans ek lo bann gro vaza Larénion ou ek bann boug kom Virapoullé**". Sé posa li la di "**nou la fé in lérèr fé rant ali dan lo MIR**".

Po Serge Sinamalé "**War solman Vergès dann télé ou sinonsa son foto dann zournal, Jean-Baptiste Ponama té viyn fou, li té gingn pa kontrol ali, li té rant dan in kolèr kom pa posib. Li té minm oblizé eskiz ali aprés ek lo bann kamarad. Kan Tristan Souprayen-mestry la kit lo MIR aköz li minm, li lavé lo minm réaksion.**"

Jean-Baptiste Ponama té mépriz lo pèp, po li navé riyk bann zintéléktièl i pouvé fer la révolision, ek lo bann travayèr li lavé lo minm konportman kin patron. Li té ve fé lo bo dovan lo pouwar kolonial, èt prézantab".

Po Jean-Baptiste Ponama "**Bann lider kom Machoro, Kabral, Lumumba, le Che té pa asé bon po li, banna la donn zot vi po riyk, son modèl té Djibaou, Kadhafi té prèsk in bébèt po li. Mé si zamé té donn in moné po alé zélèksion kolonial li té dakor ferm lo zié andsu**".

Lo kozman Serge Sinamalé i permèt anou mié konprann, koman la fini par shaviré lo zafèr. Sé posa anou LPLP nou lavé zamé mèl Jean-Baptiste Ponama anlèr podvré, nou té koné listwar, nou té koné sat la spasé. Sat i konésé pa, la mank respé Serge Sinamalé san konprann.

15 MARS 1986 KONFERANS INTERNASIONAL TRIPOLI - LIBI

Lo 15 Mars 1986, Serge Sinamalé la koz anlèr si podiom dovan tout bann délégasion té la dan gran sant konférens internasional laba Tripoli. Li la koz po lo MIR, li la koz po lo pèp rénié. Té promié kou li té koz dovan in paké moun komsa, sakinn té roprézant in lorganizacion, sinonsa in péi.

Té in lonèr po Serge Sinamalé, esplik nout konba, lo konba po lindépendans Larénion. Li la koz dovan bann responsab libiyn, dovan lo Kolonèl Kadhafi.

Lo délégasion rénié té laba zour la, la di té in lonèr po zot.

Pandan lo tan zot la rès an Libi, zot la koz ek in ta délégasion internasional. Mazinn tout léshanz, tout bann rankont espésial banna la gingn fèr.

Zot la rorant Larénion ankor plifor, po prépar dot konba é dot rankont. Té in voyaz, Serge Sinamalé la di sa, la fé konèt nout konba podvré partou é la rouv dot port po donn anou la fors.

"Lobsésion Jean-Baptiste Ponama po Vergès ek lo PCR, la fini par aminn ali atak riyk lo Parti Kominis é oubli dénonns lo bann réaksionèr dan nout péi". An minmtan po Serge Sinamalé "lo MIR i dwa pa èt in PCR bis".

Serge Sinamalé la rovni ankor su lo rénion lo MIR lo 2 févrié 1986, li di ke po Jean-Baptiste Ponama "lo voyaz lo MIR an Libi i poz ali problinm, li lé pa dakor la fason la spasé, pa dakor ek lo pozision Serge Sinamalé la défandu a Tripoli, lo stratézi lé pa sat li défann". Po Serge Sinamalé "Li la mont lo bann kamarad lavé parti an Libi ek lu kont lu po prann lo kontrol lo MIR, prann la tèt lo MIR é dénati ali."

LO MIR PONAMA

Lo 13 févrié 1988 Jean-Baptiste Ponama, Michel Réale é dot kamarad i mèt dobout in not MIR kont sat Serge Sinamalé, li a pri kontak avèk bann disidan du PCF an Frans po zwè kont lo PCR é kont lo MIR istorik. Banna la bord ali vitfé é la pa rant dan son ze. Nout kamarad Serge Sinamalé ek dot kamarad la kontinié lo konba zot koté. Lé kontak ek bann lorganizacion é bann péi deor la kontinié, Serge Sinamalé la roparti 2-3 kou an Libi, po

4 ME 1987 RANKONT EK KADHAFI TRIPOLI - LIBI

Serge Sinamalé la rankont lo Kolonèl Kadhafi sou son tant pandan 3 zèr tan dan la kapital Tripoli, lo 4 Mé 1987. Té in gran lonèr po lo lider lo MIR, li té kom in vré Shèf Léta rénioné.

Nout kamarad la esplik lo lider Libiyn, koman bann révolisionèr rénioné i rofiz lokipasion zot péi par linpérialis fransé é pokwé té inportan po lo MIR koz direktoman ek li po esplik ali la lit nou minn kont léta kolonial fransé. Té in zour espésial, pa toulézour noré gingn koz komsa ek lo Kolonèl Kadhafi, pandan lontan komsa.

Aprés an Mé 2004, kan lo Kolonèl Kadhafi té Prézidan lo Gran Lasanblé bann péi Lafrik (UA) li la fé romèt podvré nout péi Larénion dan la list bann péi Lafrik po dékolonizé. Dan lo dokiman stratézik la di Larénion sé in péi okipé par la Frans. Zot i mazinn koman té inportan po nou, po Larénion é po nout konba po lindépandans.

LI LA GALIZ IN SOMIN PO NOU

fé avans nout konba é fé konèt partou la sitiasion kolonial Larénion. Po tout bann domoun, kiswa isi Larénion ou dann péi deor, Serge Sinamalé fondatèr lo MIR, la rès lo sèl roprézantan lo mouvman indépandantis Larénion. Lot MIR la fané, la tinn tousèl.

Zordi lo LPLP la prann lo relé po la dékolonizasion Larénion é lo konba po lindépandans. Bernard GRONDIN nout Portparol la fé natirèlman la tranzision ek lo MIR.

IN DOKIMAN 7 PAZ PO LISTWAR LO MOUVMAN

In dokiman nou koz piblikman andsu po promié kou, nou pans té inportan partazé, minm si nou la pri riyk in lèstré, lo dokiman li minm i fé 7 paz tapé ek mashinn. Na mèt dot dokiman dann Fanal kan sra posib. Serge Sinamalé la lès anou in vré léritaz, anou konèt manié ali kan i fo.

RADIO KORAIL TE IN RADIO INDEPANDANTIS

Serge Sinamalé la rovni osi su la périod 1983-1985, kan Radio Korail, té in radio indépandantis, Tristan Souprayenmestry té fé fonksion dirèkter, avan lo radio té pass sou lo kontrol lo PCR via lo SIVOMR-ARDECO. An 1983 Bernard GRONDIN (zordi Portparol LPLP) té okip osi Radio Korail, li té rouv lo radio granmatin fénwar é té roferm ali tar lo swar. Li té kom in gardiyn lo radio dan la ZUP o Por. Séé komsa apré li la mont son prop radio, Korail la donn koudmin.

Serge Sinamalé té in pasioné radio kom Bernard GRONDIN, zot la fé la CB osi pandan 2-3 zané. Kan lé 2 té rankont azot té koz pa riyk la politik, minm si la politik té gouvern zot mazinasion.

AFRIK LIB IN ZOURNAL PANAFRIKIN

Lané 1983 la vi osi fénésans in zournal panafrikin po Loséan Indiyn, té apèl Afrik Libre, isi Larénion té lo MIR té port ali, Bernard GRONDIN té tiyn la permanans toulézour Sindni, Tristan Souprayenmestry té lo responsab po Larénion. Lé 2 té ékri zartik po lo zournal. Bernard GRONDIN kom roprézantan Larénion, la minm partisip in rénion internasional Moris su lo zournal.



Serge Sinamalé i fini son kozman, an romazinan konbiyn bèzman li la gingyé, po sov la po Jean-Baptiste Ponama, kan lé 2 té ankor dann PCR é lo FJAR an 1967, po lo bann ralé pousé Brapanon, sinonsa kanbiston, po pa di plis, tansion pangar. Té lèr dir sat li la di.

TANPON KONTKOLONIAL SA IN NOUVO SITWEB LETA RENIONE



"In sèl pèp in sèl nasyon anou minm rénioné nout libèrté tanou sa minm i donn anou la fors lèv dobout"

Sa in nouvo sitweb Léta Rénoné, in sitweb lo Konsey Kominal Kontkolonial Tanpon.

<http://tanpon.kontkolonial.org>

Ladsu zot va trouv tout bann zinformasion su kominn Tanpon. Si son listwar dan tout son dismansion. Viyn azot louké, si zot na in kozman, sinonsa in kèstion po pozé anvoy in mésaz ladrès mèl :

tanpon@kontkolonial.org

Nora dot sitweb Léta Rénoné po levé tanto, po mont azot nou lé partou, po dénonns lo sistinm kolonial dann bann kartié osi, po tiynbo ek toutsat lé dann malizé.

SERGE SINAMALE - JEAN BAPTISTE PONAMA "IN DIFERANS IDEOLOZIK E STRATEZIK"

In kozman Bernard GRONDIN Portparol lo LPLP

Lo Portparol lo LPLP la di po nout journal "Ki fo zamé oublié kisa la mèt dobout lo promié mouvman indépandantis dan nout péi. Serge Sinamale la mont OCMLR, lo MPLR, lo MIR.

Li la fé konèt nout konba dan bann péi deor, partou té posib alé li la parti. Serge Sinamale té viktim la répresion kolonial, la trayzon son bann kamarad té otour li, banna la sali ali, la bord ali, la donn kozman po fé mal ali minm, lavé pwin respé. Na domoun lavé lintéré - sinonsa la fé bern azot par bann zazan léta kolonial - kass lo mouvman, défann lo mouvman avansé. Bonpé lé ankor la zordi, lé kashèt, lé planké kom i di, la pèr tansion pangar i mark zot non terla. Listwar va ziz azot, pa zordi pa domin va ariv lo zour, la vérité va pèt an flèr.

Rozman nout kamarad Serge Sinamale, la zamé larg lo kor. Mé nou pe mazinn sat li la rosanti kan toutsa larivé. Tout sakrifis li la fé po la lit po lindépandans Larénion.

Kan nou parl trayzon, na sat la fé sa piblikman, na sat lavé pèr koz an fas é lavé sat la fé krwar ke zot té tynbo touzour ek Serge Sinamale, dovan li, po mié désann ali par dérièr. Té minm pir ankor, désertin té itiliz lé 2 kan, po zot prop lintéré, zot prop avègléman, zot prop vanzans.

Lé inportan po la novèl zénérasion konèt é konprann tousa, tir lo bann loson kom i di, po avans pli vit. Souvan i di nout linmi lé zamé tro lwin, na sat nou koné é na sat i atann zot lèr, pli difisil po débiské. Serge Sinamale la lès anou in vré léritaz politik, anou itiliz ali".

Bernard GRONDIN lo koni Jean-Baptiste Ponama "kan li lété dirizan kominis dan lo PCR ziskan 1978. Aprés mwin la rovi ali an avril 1983 Sindni dan lo biro lo MIR ek Afrik Libre (journal panafrikanis) ek Serge Sinamale, Tristan Souprayenmestry, Michel Réale ek Daniel Honoré" (li lavé rant dan lo MIR an sektanm 1981).

"Fo pa oublié idéolozikman Jean-Baptiste Ponama té plis koté la Rusi kan Serge Sinamale té plis koté la Shinn lépok la. Mé an minmtan lo MIR té pa OCMLR ke lété in lorganizacion kominis indépandantis, lo MIR té zis in lorganizacion indépandantis. Tristan Souprayenmestry té in sindikalis CFDT prosh

lo parti sosialis. Lavé in gran diférans ant lé 3 dirizan, lépok la li té okip osi Radio Korail o Por, té Daniel Singaïny lo Prézidan, an plis kan ou mazinn ke Tristan Souprayenmestry la di lontan apré, li la zamé été indépandantis".

"Zot i wa lo diféran idéolozik té ankor pli for ek Tristan Souprayenmestry".

Po Bernard GRONDIN "té presk lozik kan la kass an morso. Stratézikman shakinn té mazinn diféraman osi".

"Ant 1983 é 1986 mwin la travay ek lé 3, kan lo zafèr la deviré té pa fasil konprann sat té spas, mwin lavé 26 zan lépok la. Idéolozikman é stratézikman minm si mwin té travay pli souvan ek Tristan



Souprayenmestry mwin té pli prosh Serge Sinamale. Sé posa an ziyn 2008, té lozik marsh ansanm Serge Sinamale dan lo LPLP".

"Mwin la milit podvré dopi avril 1983 dan lo MIR, Serge Sinamale té viyn souvan la kaz (mwin té abit Tévlav lépok la) po koz la sitiasion politik dan nout péi é an deor. Té ariv mwin té mont osi Sintandré, minm si mwin lavé pwin tro transpor, té lwin".

Po terminé, po Bernard GRONDIN "lo LPLP i kontini lo travay Serge Sinamale é i pouss ali ankor pli lwin, po minn nout péi ver lindépandans. Léta réioné lé an marsh, sé sat Serge Sinamale noré vouli".

SITWEB MOUVMAN INDEPANDANTIS RENIONE - LPLP : <http://www.lorganizacion.org>



Lo Mouvman indépandantis réioné na son sitweb dopi mwa zanvié 2020, ladsu zot va trouv tout sakifo, zinformasion si laktialité, bann zarshiv é plinn zafèr si listwar lo mouvman. Ladsu zot va trouv osi lo dernié journal Fanal an télésharzman, an 4 lang Kréol, Fransé, Langlé, Lèspanyol. Fanal na osi son sitweb ladsu zot va trouv dopi promié niméro zisko dernié po télésharzé : <http://fanal.lorganizacion.org>

Nou lé finn mèt osi andsu bann dokiman ek journal OCMLR - MPLR - MIR po télésharzé. In fason fé konèt nout listwar, partaz nout listwar ek sat i ve, po nou avans plis dovan. Na riyk komsa réioné va aprann son listwar é va konèt sat la batay vréman po nout libèrté, po nout péi.

BANN SITWEB LETA RENIONE : <http://www.kontkolonial.org>

<http://gouvernman.kontkolonial.org> - <http://gran-konsej.kontkolonial.org> - <http://gran-lasanble.kontkolonial.org>

